

500 meters cubic en treis meins

La lenna per la nova stalla dalla claustra a Mustér vegn resgiada sil plaz

DA HANS HUONDER / ANR

■ **Rodund 500 meters cubic lenna ein necessaris per la construcziun dalla nova stalla dalla claustra a Mustér. Quella deriva dalla regiun e vegn resgiada sil plaz. Rodund treis meins ha Willi Baier da Landquart per procurar quaders ed aissas per igl edificci niev.** Patrun e planisaders dalla stalla nova a Salaplauna han buca semplamein vuliu ereger in baghetg convenziunal d'agricultura. Dall'entschatta enneu han els giu la finamira da procurar per in edificci che va a prau cul contoorn, mo che tegn tonaten quonquand dall'incumbensa futura. Il medem vala pil material che vegn utilisau cheu. Enstagl da vegnir neutier cun lenna tagliada e finida per la montascha ei ins sedecidius per lenna indigena e da laschar tagliar quella sil plaz cun ina resgia movibla. Quella lavur vegn exequida il mument da *Willi Baier* da Landquart.

Ina gronda lavur

Dapi rodund 15 onns posseda Willi Baier sia resgia movibla. Ensemen cun quella ha el acquistau ulteriuras maschinas che surveschan ad el sin ses plazs da lavur. In da quels agids ei ina tschaghegna che vegn en funcziun per menar las buoras sin la meisa dalla resgia. «En tut haiel jeu investau en quella infrastruttura rodund in miez milliun francs», di Willi Baier. Onn per onn resgia el rodund 1300 meters cubic lenna rodonda en differents loghens dil cantun Grischun. Da veser alla lavur eis el surtut el territori dalla Val dil Rein ed en Portenza: «En singuls loghens, sco per exempel a Claustra, sundel jeu regularmein la primavera e per part era igl atun. Cheu saiel jeu lu regiar lenna gestamein per plirs clients.» L'incarica ch'el ha retschiert uonn dalla claustra a Mustér ei cun 500 meters cubic lenna da resgiar fetg gronda: «Da quella dat ei buc adina



Willi Baier installescha la maschina per il proxim tagl.

FOTO H. HUONDER

na. Ella media importan las incaricas denter 60 e 100 meters cubic. Ina ga ni l'otra mondel jeu era sin viadi mo per diesch meters cubic.» Igl interess che la populaziun a Mustér ha mussau per la resgia movibla ei gronds. Quei sa era frater *Niklaus Schwegler* dalla claustra confirmar: «Bia gliued ei vegnida cheu per mirar quella installaziun ed igl andament dalla lavur. Entochen sin pintgas excepziuns ein las reacziuns stadas trasatras positivas.» Ultra da Willi Baier porschan

aunc dus ulteriurs resgiaders quei survesch el cantun Grischun. Rodund 20 resgiaders fan quei el temps liber, denton cun ina pli mudesta infrastruttura. Pli derasadas ein las resgias moviblas sco quei che Willi Baier posseda en la regiun dil Tirol dil sid.

El senn ecologic

Cun resgiar la lenna sil plaz spargna il patrun dil niev baghetg d'economia a Salaplauna ils viadis cun la lenna en resgia.

El spargna daners e contribuescha aschia enzatgei all'ecologia. «Ils cuosts sco tals da resgiar ein praticamein identics cun quels d'ina resgia convenziunala», di Willi Baier. La lenna che vegn resgiada per la claustra havess buca saviu vegnir elavurada tier la resgia industrialia Stallinger a Domat e per ina buna part era buc en resgias stablas dalla regiun. «Ils diameters da quella lenna cheu d'entochen varga in meter e trenta ein buca gavischai leu. Ultra da quei resgiein nus

cheu lenna d'entochen 13 meters lunghezia. Era quei fuss buca vegniu exequiu da Stallinger», di il resgiader da Landquart che ha empriu oriundamein da scrinari. Essend ch'el posseda ina resgia circulara che fa in tagl per ga sa Willi Baier era nezegiar meglier la lenna: «Cun ina resgia da garter che resgia la lenna rodonda il medem mument cun plirs tagls san ins buca far quei.» Quella qualitat che pretenda naturalmein dapli temps per l'elavuraziun dalla lenna vegn dabien al baghetg. Aschia eis ei pusseivel da sortir megliera lenna da meins buna.

Occupaus compleinamein

«Ils davos onns haiel jeu giu dabia lavur», di Willi Baier. La resgia da Stallinger ei per el negina concorrenza: «Els uauls grischuns dat ei fetg bia lenna veglia da gronda dimensiun. Quei ei nies trumf, essend che nus lein e savein era elavurar quella. Il sulet problem ei che las incaricas vegnan oz a fetg cuort termin. Nus essan el temps dil natel.» Per installar la resgia movibla drova el entochen in miez di. Quei ei dependend dalla lunghezia dalla lenna ch'ei da resgiar. Willi Baier ei era sespecialisau ils davos onns sin resgiar lenna veglia. Per impedir donns da ferradira catschada en quella lenna vid la resgia ha el medemamein acquistau ina sonda che po eruir quella. Medemamein ei el en possess d'ina fresa che lubescha – sco per exempel uss a Salaplauna – d'exquir lavurs specialas vid la lenna gia tagliada. Sco quei ch'il resgiader puntuescha sa la lenna vegnir resgiada fetg exact e quei malgrad il sistem movibel.

Las lavurs per la nova stalla dalla claustra a Mustér ein dil reminent el program. Quels dis ha la claustra era retschiert la novitad ch'igl indrez solar previus sil tetg sappi vegnir construius. Tenor frater *Niklaus Schwegler* ei la finanziaziun da struschamein in milliun francs segirada.

La posta da Sagogn vegn serrada

Il president communal ha orientau quei alla radunonza communal

■ **(Iq) Il venderdis sera ha la suprazionza communal da Sagogn enviad ad ina radunonza communal. A caschun da quella ha il president communal presentau il quen annual 2007. Quel siara tier entradas da 2,585 milliuns ed expensas da 2,577 milliuns ed amortisaziuns da 123 468 francs cun in pign gudogn da 7829 francs.** Senza far diever dalla discussiun ha la radunonza communal dau scarica allas autoritads ed approbau il rendaqen 2007.

Ina schliata novitad

Malgrad il bien andament economic ha il president communal stuiu orientar ils presents davart in fatg meins positiv. Damai ch'il postentent actual mida piazza ha il concern dalla Posta priu la caschun da metter en damonda igl ufeci postal da Sagogn. Ils responsabels dil concern han mess las autoritads avon fatgs cumpleni. Sco quei ch'il president communal *Flurin Panier* ha confirmau ha la Posta deciduu da serrar il biro postal. Ils responsabels argumenteschan quei pass cun magras frequenzas duront las duas uras ch'il biro ei aviarts mintga di. Las autoritads hagian ussa mo la cuida d'eleger denter duas alternativs che la Posta porscha. Ina ei quella d'introducir il survetsch da casa – sco en melli auters loghens en Svizra, l'otra fuss che la stizun dil Volg surprendess incaricas d'agentura da posta. Entochen la fin da settember sto la suprazionza communal comunicar la de-

visiun als organs dalla Posta. Il termin dalla serrada dil biro postal ch'ei domiciliu dapi 1954 ella casa da scola han ins aunc buca saviu comunicar.

Credit per l'avertura digl Uaul da Gonda

Plinavon ha la radunonza communal approbau il venderdis in credit net da

66 000 francs per l'avertura digl Uaul da Gonda. Ei setracta d'ina investiziun che pertucca la vischnaunca da Sagogn per sulettamein 15%. La gronda cumpart dil project pertucca las vischnauncas da Schluen e da Falera. Cun in lev surpli da vuschs e suenter discussiun han ils votants da Sagogn approbau il credit.

Ultra da quei han votantas e votants

da Sagogn approbau unanimamein ina revisiun parziala dalla lescha davart las taxas da cura e promoziun dil turissem. Grazia alla revisiun sa l'Uniuon da traffic da Sagogn augmentar sias tariffas e pauschalas e garantir ses survetschs a hosps ed indigens. Cunzun il bus gratuit da skis vegn finanziaus cun quella contribuziun.



La posta da Sagogn vegn serrada. Las frequenzas ein buca cuntenteivlas.

FOTO G. VENZIN

TUJETSCH

Approbau tuttas fatschentas

(gv) Il venderdis sera ha il suveran dalla vischnaunca da Tujetsch approbau la fusiun dil corps da pumpiers da Sursassiala, la vendita dalla casa Cadruvi ed igl acquist da terren a Dulezi.

La reorganisaziun dil corp da pumpiers era gia vegnida approbada ellas vischnauncas da Mustér e Medel. Muort la reorganisaziun e la centralisaziun dalla protecciun civila e culla revisiun dalla lescha federala davart la protecciun dalla populaziun seigi la muntada dils pumpiers s'augmentada, haveva la suprazionza scret el messadi. En cass da crisa seigi semussau che la grondezia dils singuls corps tonschi buca per dar damogn. Avon dus onns han ils geaus cumpetents da Tujetsch e Mustér instraduu la discussiun d'ina fusiun. Ils exercesis comunabels eran stai il motiv persuerter. Il domicili da Pumpiers Sursassiala ei Mustér. Il cader secumpona da silmeins in cumandant e treis vicecumandants, officiers, meinagruppas e furiers. Las persunas da cader vegnien recrutadas tenor pusseviltad da tuttas vischnauncas partecipadas. Il material dil corp dallas treis vischnauncas vegn inventarisau il december proxim e surdaus alla corporaziun. Ils locals da pumpiers existents restan en possess dallas treis vischnauncas. La finamira dallas treis suprazionzas communalas ei da realisar la fusiun s'ill'entschatta 2009.

L'entschatta da quest onn ha la vischnaunca scret ora da vender la casa Cadruvi a Sedrun muort munconza dil basegn. Plirs interessents ein s'annunziai. *Luis Curschellas* (Intersport Curschellas) ei gia locatari da pliras localitads e la vischnaunca ha vendiu ad el il baghetg per 650 000 francs.

Ils vischins da Tujetsch han plinavon approbau il venderdis sera in credit per la cumpra da terren a Dulezi. Sin quei terren duei vegnir baghegiu en favur dalla vischnaunca da Tujetsch.